


GARO READER III

PORAIANI KITAP III





# PORAIANI KITAP GITAM

## GARO READER III

THE CHRISTIAN LITERATURE SOCIETY FOR INDIA  
(United Society for Christian Literature)  
MADRAS BANGALORE MYSORE TIRUVALLA COLOMBO

1953

*Copyright*

PRINTED IN INDIA AT  
THE WESLEY PRESS AND PUBLISHING HOUSE  
MYSORE CITY

## LESSONRANG

No. OF LESSONS	HEADING OF LESSONS	ENGLISH TRANSLATION
1.	Edward VII	Edward VII
2.	Alabok aro Chalakigipa Angke	A Crane and a Cunning Crab
3.	Kasagipa Raja	A Kind King
4.	Bebeko Agangipa Bisa	A Truthful Boy
5.	Atam	Evening
6.	Knitangko Palgipa Mechik Bisa	The Girl who Sold her own Hair
7.	Dukni Katakoi Maikai Rajana Knaataha	How the Sad News reached the King
8.	Songtango Rongtale Rakiani Cholrang	Means of Keeping our Villages Clean
9.	Iswar Chandra Vidyasagar	Iswar Chandra Vidyasagar
10.	Reil Garini Station	A railway Station
11.	Timi Natok	The Whale
12.	Grace Darling	Grace Darling
13.	Mande Bone aro Chalakitigipa Gamgipa	The Dwarf and the Cun- ning Farmer
14.	Raja aro Koedirang	The King and the Prisoners
15.	Banggria	An earthquake
16.	Rongtalatani	Cleanliness
17.	Booker T. Washington I: Uni Bisamiting:	Booker T. Washington I: His Childhood
18.	Booker T. Washington II: Uni Schoolo Poraiani	Booker T. Washington II: His School Life
19.	Booker T. Washington III: uni Kam Kaani	Booker T. Washington III: His Work
20.	Tangka	Money
21.	Bararangko Krae Gana Chinani	What Clothes to Wear
22.	Sagu	Sago
23.	Dalgipa Roong	The Big Stone

No. OF LESSONS	HEADING OF LESSONS	ENGLISH TRANSLATION
24.	Goliath: I	Goliath: I
	Goliath: II	Goliath: II
	Goliath: III	Goliath: III
	Goliath: IV	Goliath: IV
25.	Dorong	The Swallow
26.	Kitapko Chapa Kach- engani	The First Printing Press
27.	Rajani Bariko Nitim- giparang	The Watchers of the King's Garden
28.	Dr. Rouse	Dr. Rouse
29.	Mane Chagipani Hira	The Diamond of the Rich Man
30.	Bisani Maana Kasaa	The Child's Love for its Mother
31.	Antangni Dedrangko Jokatgipa Mechik	The Woman who Saved her own Children
32.	Bebegipa Achak Gelert	The Faithful Dog Gelert
33.	Game Chagipa aro Uni Depante Sakgni	The Farmer and his Two Sons
34.	Jackni Rasong	The fate of Jack
35.	Maikai Raja Kakketgipa Mandeko Bikota	How the King Chose the Honest Man
36.	Raja Dalgipa aro Dumbur Biterang	The Emperor and the Figs
37.	Doka, Dokru aro Mese	The Crow, the Pigeon and the Rat
38.	Kakket Dakgipa Raja	The King who did Justice
39.	Behalako Gonge Sala	Willingly Playing the Violin
40.	Sikhrangni Abachengani	The Origin of the Sikhs
41.	Achik Songo Kristian Toromni Ongbachenga	The Origin of Christianity in the Garo Hills

# GARO READER III

## Lesson 1



Edward VII


Anchingni Moharaja Edward snigipa 1841 bilsini November 9 salo atchiaha. Ja gni ongai-pition Canterburyni Archbishop una bimungko one uko Albert Edward ine mingaha. Ua bisantal changbegipa maa Moharani Victoriani dilako manaha. Ua Edinburgh Universityo, Professor Hayfaironi, pilak kamrangni gimin skiako manmano, Oxfordni Christ Church Collegeo, aro Cambridge Universityo poraiaha. Dakgrikani kamkoba skie ua 1858 bilsio K. G. upadhiko

mane jamano Field Marshal ongaha. 1863 bilsini abachengon Parliamentni House-of-Lordso napaha, chongmotan Lordrangni melaa chanchipagiparangoni saksa ongaha. Ua bilsini March 10 salo ua Denmarkni rajani demechik Alexandriako bia kaaha. 1875 bilsio Lord Northbrookni India sason kamitingo ua magipani pal Indiaona rebae banga asongrangko niaha, aro pilak Indiani rajarangko grongaha, aro kasaani kamrangko bangen dakangaha. Gaikwar, Sindhia, Holkar aro Nizam, ia rajarang uko mande rana ine una gamchatbegipa ripokrangko onaha. Un baksa saksa sirdarba tangka lak sa hajal sotchet damni tonual mangsako una onaha. Ua tonualo sonachi indine sea gngangchim, 'Naa namnikode iako ongipani gitokko sote nie iani matako uina mangan.' Uni magipani siani jamano Edward Moharajani kamko mane 1901 bilsini August 9 salo mukut stikatako manaha. Ua kasabegipa raja ongachim. Ua pilak manderangni aro asongrangni tomtom aro nangrimaniko am'achim. Indaken ua raja ongmitingo bil ama dipet asongantiko rereroe pilak baksan nangrimaniko dakaha. Uni gimin '*Peace Maker of the World*' ine uko mingaha. Ua antangni depante Frederick George V-na kamtangko donange salgio jringjrotna nengtakna 1910 bilsini May 9-ni walo anchingoni reangaha. Uko gopani salo asong gipinrangoni raja aro ranirang sakprak dingprak kasaani ripokko akolo donataha.



Ua ripok dingprakni dam hajal gni ritcha bongana agre komijachim. Indiba Bombayni mingsinggipa saksa Mussulman Aga Khanni ona pilakna bate gamchatbatachim. Uano bibal banga; lily hajal sa, golap bibal bangbea aro balgitorang gngangchim. Ua kasagrika, nangrima, aro tomtomaniko ambatgipa ongani gimin manderang uko namnikbeachim. Ua siahaoba manderang uko mande raengpiti. Isolba kasagipa aro nangrimatgipako namnika; maina nangrimatgiparanko Isolni dedrang ine minggen ine Jisu aganaha.

### Lesson 2



### Alabok aro Chalakigipa Angke

Mangsa alabok budepa bilgri ongahani gimin, antangni bitip sepango donggipa chibolni

natokrangko rime chana amjae, ua maiba mingsa-chalaki dakachi uarangko chana ine mangsongaha. Uni gimin ua chi rikamona reange aganaha, 'O ripengrang, nasimang natok ba gipinba onja maina nasimang dao maikosa daknasia? Manderang rebae ia chibolni chiko tipe satna am'engjok. Anga gisep gisep nasimangko mangsa manggni dake chaa beben, indiba anga nasimangna kasachaka, aro nasimang gimikko rangsan siattokakode anga namnikja. Uni gimin nasimang angni aganako manipana skode, anga nasimangko mangprakprak balange, ianoni adita chelao donggipa, dalbegipa aro tubegipa, chibolo donena mangel; maina uano kenchakani gri. Nasimang angni aganana kenchakode, natok mangsako ang baksa watatchengbo. Anga una ua dalbegipa chibolko mesokgen.' Unon natokrang uni aganako bebe rana manjani gimin, un baksa natok mangsako watatchengaha. Alabok ua natokko kusiko kasne balangemung, dalbegipa chibolko mesoko uko balbapile ripengskarang baksa donepilaha.

Uarangni watatgipa natokni kusiko, beben chibol dalgipa aro namgipa dongbebea ine knaoa, natokrang alabok baksa reangpana namnike agantokaha, 'O alabok, indide naa kasapae chingko dakchakpabo.' Alabok gisiktango chanchiaha, 'Daode anga nasimangko mangsa mangsa dake chana manginok.' Ua namen kusi ongbee

mikkangparade agana dakmaiaha, 'Anga nasiman-gko ama dipet dakchakgen.' Alabokni kusi o ngara onggramaijok; maina ua pilakna skang angkeko balangchengaha. Ua angkea chalakigipa ongachim. Uni gimin ua alabokni aganana kadongsrangna manjaenba, uni gitoko kasne kepe rena ine uo molmolaha. Alabok mamungkoba chanchigija indaken rechina urta onaha.

Alabok ua angkeko bilbitange, dalbegipa bolni pekkamo mabakeaha. Angke singaha, 'Baosa daoa, chi dalgipara?' Alabok aganaha, 'Chi dalgipa! Baoni chi dalgipako naa janapengasai? Angni indita duk chakade magnasa duk chaka ne? Anga antang chike chana bilgriahanasanba nasimangko mangsa mangsa dake balbae chapana ine indake dakpaenga.'

Unon angke aganaha, 'Angaba indaken skang intalan chanchisoenganoba.' Indine inenba, angke alabokni gitokko rake kepsotaha. Unon alabok aaona gaake siaha.

Namgijagipa aro chalaki dakgiparang antang-tangan jagatangtango nangronga.

### Lesson 3

#### Kasagipa Raja

Arabia mongsongde dalgipa agisini asong onga. Uno agisini dinggipa anchengraran dongaia. Ua asongo mande chelbee reangoba, chiko nikna

manjawa. Indakgipa asongrango chimikrang dongbreja, aro banoba chimik gngangode ua namen gamchatbeani onga.

Agisirangko batmitingo banga Arabrang chi ringna manjani gimin sironga. Aro uamangni utrangba, chi ringna skako chakchikna ambegipa ongoba, gisep gisep chi ringna manjani gimin anchengrango gitilkrope sironga. Indakgipa biaprango kimongbegipa chibolni chiko manode, manderang ukoba gamchatnikbea.

Changsao saksa Arab agisiko ree chi ringna sikbeaha. Ua nengbeoa, damsna namgipa grikgipa chimikko nikaha. Ua uko koe ringon, mamung saloba indake namgipa chiko ringmankuja gita nikipilaha. Ua chi rajarangnasa kraa ine chanchie, ua uko bigilni basingo koe rajatangna rabaaha.

Rama chelbeani gimin ua rajaona sokeningjaha. Indiba ua sokbaon, ua chiko rajana oneaha, aro rajaba uni ona chiko namen namnikbeako mesoke rachaksoaha, aro pialao ontisa ruchina geetemung, uko ringote nie namen mitelbeaha. Raja baksa dongpaenggipa manderangba ua chiko ringe nipana sikbeachim, indiba raja uamangna ringna onpajaha. Raja chiko rabagipa mandena banga boksisko one uko watataha, aro ua mandeba namen kusi ongbee reangaha. Uni reangmano, raja antang baksa donggipa manderangko okame aganaha, Anga maina ua chiko nasimangna ringna onja, uko nasimang uiama? Ua chi ruuta salna kingking

bigilni basingo dongahani gimin soaha. Nasimang uko ringahaode sanaba gngangchim. Chiko ringe nimitingon una mitchiako mesokode, ua chiko rabagipa mande gisiko dukko mannaba gngangchim. Uni giminsa anga nasimangna ua chiko ringna onjaha. Ua mande angna kasaani giminsa ua chiko chelbea ramaoniko simsakbee joton kae rabaaha. Uni gimin anga uko duk manate watatgija, kusi ongate watatna skaha.

Saoba nangna maiba kasaani kamko dakahaode, ua kam chonbeoba, aro mamung gamchatani onjaoba, uko kusi onge rachakna, aro uko kusi ongatna gita mitelna kraa.



### Lesson 4

### Bebeko Agangipa Bisa

Americako jakgitel ongatgipa, aro ua asongni pamong ongchenggipa George Washington bisa chongipa ongengmitingo, sal sao antangni rua bisako rabite bario roengachim. Indake

romitingo ua barini bol bisa pangsako dene roaha. Uabol bisara pagipani namnikbegipa bol ongachim. Uni adita salni jamano pagipa antangni bariko nirokmiting0, ua bol bisako saoba denaha ine nike gisiko duk manbeaha. Haida Georgean denengnaba donga ine chanchie, ua uko okamate singaha, 'George, naa ia bol bisako dene roahama?' George pagipana kenoba, mamungba tolgijan kurachake inaha, 'Oe apa, anga dene romanaha. Pagipa antangni namnikgipa bolko denahani gimin, aditan gisiko kaonangenga gita ongoba, degipani bebeko aganako knae namen kusi ongbeaha, aro kasaan gape uko gipake kudimaha.'

Anchinga pangnan bebekosan aganna nanga. Bebeko aganronggipan kasachakako manbatronga.

## Lesson 5

### Atam

1. Saliramchi gitchak gitchak salni napangengo, Kasindikdik jrimjrim dake walni andalango; Dokurang, matkurang, pilak mikogipar-angba, Dontokaha mikogija daode u'rangba.
2. Salgimiko dukko chake a'ko gamgiparang, Nengtakpana kusi onga daosa uamang. Mamaanti dukniran-  
chi gapgipa gisikde, Daosa chanchie dukko manbata uade.

3. Walni andalangan baksa pilak duknirangba,  
Kaa suang mikchi jingjang nabaa u'rangba.  
Walo tusipana ine pilak janggirangan,  
Sikdak bakdak turamtangko sandia pilakan.
4. Bara kancha dongpagija silpagijarange,  
Sinkarini walanade kensoa u'mangde.  
Bako ma'na bako pa'na andap pindappagen,  
Maiko pinadapemung danang derangkon  
dingatgen!
5. Chudapsiko gantong soe wal gimik rengkone,  
Samsa bara samsa waal ketchie anpile;  
Alamala dingatemung tusinaparia,  
Jeentensa sinkarini walko sengataia.
6. Tongsa ane tongsa pine mitamde kingsakon,  
Simak sasanmangmang tue sengataia walkon.  
Sinbo dingbo jeba ongbo ganggipa mandede,  
Nengsikime tusinapa danang uamangde.
7. Gitel Isolni pilakkon kasae nirokjaode,  
Chaktogija chakaigenchim kangal cholgri-  
range.  
Indioba Isol danang pilaknan kasara.  
Kangal segri, bisa magri, darangkon niroka.
8. Mitelbea anga nangko Isol namgipako,  
Nengtakchina ine chingna walko ongipako;  
Wal gimiko tusiemung salni nabaako,  
Niksoemung mitelchina pilak manden  
Nangko.

## Lesson 6

**Knitangko Palgipa Mechik Bisa**

Napoleon Europe gimikko amna joton kaengachim. Asong sako ammano gipinko amna krengengachim. Unon Germany antangona napbagipa bobilrangko warachaksona bil ama dipet krengsoaha. Ua asongo donggipa jakgitel ongako namnikgipa manderang pilakan 1813 bilsio antangtangni bil ama dipet krengtokaha, aro antangtango gnang pilakkon sipai kotok gitalrangko tariani korosrangna ontokaha.

Saksa Silesiao donggipa mechik bisa ua kamo dakchakpana uni gam grichim, aro je ontisa dongpaara antangnan chuongjachim. Indiba ua napbaenggipa bobilrangko antangni songni manderangni dakgrikao dakchakpana uni gisiko sikbeaha, aro dongtojaha. Uni gimin ua antangni nitogipa kniko pale je ontisako mangen uachin dakchakpana ine chanchiaha.

Sal sao ua mechik bisa Breslau songjinmao donggipa kni tarie palram dokanona reange antangni kniko rasote rarikchina aganaha. Kni tarigipa mande, maini gimin ua mechik bisa antangni nitogipa kniko palna skengachim, uani aselko uijae aiao inmanpile uo singaha. Unon ua antangni mangsongako una aganaha. Indiba gongdokna bate una onna manjawa ine ua aganaha. Mechik bisa ukon namnikahani gimin



kni tarigipa uni kniko rasote rarikemung una gongdokko onataha, aro ua gongdokchi antangni songni namgnina dakchakpaaha.

Kni tarigipa mande adita tangkako bikotani cholko dakna ine, ua mechik bisani kniko ramram knirangko gita dake tarie palgija jakstem, jaksan aro mamanti gananirang dake uko tariaha. Unikoa ua mechik bisani songtangna kasae dakani kamko songbado seemung asong gimikchinan uiataha.

Asong gimikni manderang ua mechik bisani asongna kasae dakani kamko knaahaoa, pilakan uko miteltokebeaha. Uni kasae daka kamko pangnan gisik rana gita ripingna, bangan uni kniko tarigimin mamanti gananirangko manna siktokbeaha. Indaken banga manderang ua mechik bisani kniko tarigimin mamanti ganani bosturangko bangbange tangkarangko one breahani gimin kni taritimgipa banga tangkarangko manaha, aro uaba songtangni namgnina bangbea tangkarangko onskapaaha.

## Lesson 7

### Dukni Katako Maikai Rajana Knaataha

Prussiani raja Frederick the Great namen kengni aro kating dakgipa mande ongachim. Indiba ua knatogipa gam'ako namnikgipa ongachim, aro uni noko changgipa, saggipa aro

mamantini gimin uigipa manderangko donna namnikbeachim, maina ua dikdiksani gisepon kadinge agane roeba, rangsan sakoba dokchina ba sootchina hukumko onataiachim.

Ua antangni gurerangni giseponi mangsako namen namnikbeachim, maina ua gureba rajani gakatna kra kra daken namen nitogipa aro bilakgipa ongachim. Sal'sao ua gure saaha, aro raja ua gureni saako knaon gisiktango chanchiaha, 'Anga antangan dalbegipa raja ongeba, gure mangsamangmangkon tangate rakina manjaljok.' Ua namen duk manbeaha, aro gure siaha ine knaatchenggipa mandeko rangsan soote galgen ine aganataha.

Adita salrangna kingking gure uan uan dongaiaha. Indiba sal sao ua gureko nirikgipa uko nina reangon uni manggisikosan nikeariaha.

Gure maikai dongenga uko tik kagimin somoio salanti rajana aganeronggipa manderangko donahachim. Indiba sawa uni siako aganechenggen? pilakan aganena kadongjaha. Antangni janggiko gimaatna siggipa mande pilakba dongjachim. Indiba bewal gita rajana knaatani somoiba ongaha. Jamankitiko saksa pante chakate aganaha, 'Nasimang kenna nangja, anga reange gureni siani katako rajana aganegen.' Unon ua pante chakate rajaona reangaha. Raja ua panteko niksoon singsoaha, 'Gurea maikai dongenga?' Unon ua pante aganaha, 'Gurede pangnan antangni dong-

ram biapon dongenga dongade, uan tue dongenga, indiba uo bil dongja, ua ilengja, chaaba chaja, ringaba ringja, tuba tusija aro rangsitaba rangsitja.' Uni indake aganmitingon raja sengnapjae aganaha, 'Indide maisa, gure siahama?' Unon ua pante aganaha, 'Naan gure siani katakode aganchengaha, gipinni kusikonido ongkatkuja.' Indake ua pante antangni changachi, gure siaha ine rajani kusikonikon ongkatatchenge, saksa mandeko sootgnioniko jokataha.

### Lesson 8

#### Songtango Rongtale Rakiani Cholrang

Dalgipa songjinmarango *Municipality*, chongmotan songtangtango sason kagipa ba nitimgipa manderango dona. *Municipality* ni kam mongsongde songko rongtalanani onga. Indiba anchingni songo ugita songko nirokgiparang dongkuja. Dongjaoba anching antangtangni songrangko rongtale rakina nanga. Ia namchongmotgipa kamko chusokatani cholrangko adita mesokgen.

Songo donggipa sakantian antang nokni noksam nokil aro sara nokkrarango rongtale rakiode songgimikan rongtalsranggen; aro ian songko rongtale rakiani nambatgipa chol mingsa onga.

Mitam gitimrango donggipa antirango nirokchina sorkari manderango donatranga. Anti itrokgipako mali minga. Sogimin natok, been aro mi namgijarango antio palna onna nangja.

Songantio maikai namgipa ringani chiko manna amgen, indake chol mingsako dakna nanga, chongmotan ringani pokrirang, chiakolrang aro uarangni sepango donggipa biaprangko namedake rongtale rakina nanga.

Galgimin bosturang aro susrangani chirangko chele pake galna nanga; aro manode mi songchakramni sambao chikare kitna nanga, maikai moila chi chelachi joksolangna mangen.

Noksamrango a'pal rea namja. Songjinmarango paikanarangko sorkari donataha. Ua paikanarangko rongtale rakina, aro unoni moilarangko chelachi raange galchina, sorkari manderangko rakiaha.

Itrokgimin jabolrangko chimonge adita chelao baljanggilchi soe galna, ba uarangko asal chongao chimonge galna nanga. Mikka chi joksolsolna manna gita nokni samtangtango chikarerangko chona nanga. Ua chikarekoba rongtalatjringna nanga.

Songko ansengatna skode balwako gitim gimiko namedake jok ruraatna nanga. Uni gimin nokrangko baljokna gita rikna nanga. Nok gitalrangko riknasion songni nokma aro sordarrang nok rikchakani biapko nie onode namgen.

Matchu, wak ba achak siode uarangko chelachi raange gope galna nanga. Nok sepango ba song sepango mande gopram ba soram dongna nangja. Mandeko gopon akol mikbrimang tuna nanga, aro gopramni aako akae dapna nanga.

Nok sako waal kamode songgimikkon kama, uandaken nok sao maiba namgija saa napode ua songgimikon gipa. Uni gimin maikai songo donggipa nok saoba saa napjawa, songni nokma sordarrang aro songgimikni manderangan iani gimin simsakna nanga. Mande sakantian nok-tangko simsake rongtalatode ua kam songgimiknam namgni onga.

### Lesson 9

#### Iswar Chandra Vidyasagar

1820 bilsio Midnapur Districto donggipa Birsingha minggipa songo Iswar Chandra atchiaha. Ua bilsio bonga ongahaoa, leka poraina songtangni Primary schoolo napchengaha, aro uno bilsio bri poraienba ua schoolko matchotaha. Ua bilsio sku ongahaoa, schoolo poraidapna antangni pagipa baksa Calcuttachi reangaha. Uni pagipa mane chagipa ongjani gimin, antangna mi songtingipako rakina amjachim. Uni gimin Iswar Chandra antangan mi songe songe, mi songchakanirangko nate aro gipin gipin kamrangko kaenba schoolo poraina nangachim. Ua bimchipbegipa aro gisik sengbegipa bisa ongachim. Noko kam bangoba aro uarangko kae jakchakjaoba, ua jringjring-antangni lessonrangko namedake tariaha, aro pangnan schoolo lessonrangko bisaskarangna bate manbataha. Bisantal uni katongo kasachakani gisik bangachim. Gipinni dukko nikode ua duk

manchakrongachim, aro antangni gngang kakketko uamangna oneba uamangni dukko chelatna joton karongachim. Basakobaua antang ni manascholarshiponi mitamko one kangal chatroskarangko dakchakaha, basakobara ua uamangna kitaprangko bree onaha, aro uamangni saarango uamangko namedake sanna namnikbeaha.

Ua bilsu chignina kingking Sanskrit Collegeo poraie banga skianirangko manaha, aro pilak porikarango skanggipa onge, pilnipil boksiss aro scholarshipko manaha.

Bilsu 21 onghaao, Fort William Collegeo Head Panditni kamko kaaha. 1851 bilsio ua Sanskrit Collegeni Head Pandit ongha. Ia kamko kamitingo ua japrako tangka ritcha bongako manachim; indiba ua Collegeni Principal baksa maiba maiba kamrangni gimin meligrikjae ua kamko watsrangaha.

Ua Sanskrit aro Bengali kusiko banga kitaprangko seaha. Ua leka pora manbegipa onghani gimin una Vidyasagar upadhiko onaha, aro uko mingsinga asong gimikonan gipangaha.

Iswar Chandra Vidyasagar Hindurangni mingsa namjabegipa dakbewalko gimaataha. Uamangni gisepo segipani simano jikgipa se kimtaina manjawa ine niam rake dona gngangchim. Iswar Chandra Vidyasagar ia niamko gimaatna krengbeaha.

Iswar Chandra Vidyasagar Metropolitan

minggipa dalgipa. College gesako kuliaha. Ua banga namgnirangko dakahani gimin, ua simana haoba uni bimungde daona kingkingba gimakuja, aro gimajawa. Ua dala kamrangko kae aro antangni dakgimin kitaprangko pale banga tangkako mana-hachim. Indiba uko antangnasan jakkalaigija, aro chimonge donaiigija, uchin banga kangalrangko dakchakaha.

### Lesson 10



### Reil Garini Station

Reil gario reode, anchinga dikedikprakon dongdikram biaprangona soka. Ua biaprangamitam dala aro mitam chona. Reil garirangni indake

dikdikprak dongdike nengtakram biaprangkon *station* minga. Ua biaprangona regipa manderang uarangon ongonrikna nanga, aro uarangoni gakatskanasigipa manderangba bakbakan gakatskana nanga. *Station*antiona sokon chaanirangko palgiparang paljojobera. Unon okkrigipa manderang uarangko bree chana nama. Naa bachinaba rena ske reil garina sengsona nangode *stationo* asonge sengsona mana. Mitam dalgipa *station*rango manderang asonge sengsona kuturirang donga. Indiba pilakonde indake dongja, apalosa asonge sengsona nangaia. Uni gimin ruute sengsona nangjana gita, manderang reilni sokbagni somoiko ueisa *station*rangchina reangronga. Maina reil gari pangnan donsoa somoio *station*ona sokbaronga.

## Lesson II

### Timi Natok

Timi minggipa rokomsa natok agao donggipa matburunrang gita balwako rangsite tanga. Uni anchi dinga. Pilak janggi gnanggiparangni gisepo timi dalbegipa onga. Mitam timirang mik kolatchi ba mik sotbri roa. Badiaba badiabade mik sotb-ongra roa. Mik sotlandok rogipakoba nikmanaha ina.

Rokom rokomi timi natokrang gnang. Iarangni gisepo Greenland aro Sperm minggiparangan gamchatbata. Greenland minggipa timi mik kolatchi ba mik sotbri roa. Uni skoni roa been



gimikni roani bak gitamni bak sani pal onga, inditan uni sko dala. Uni kusikko kuangatode chengkna gegnini gisepko ring bolsamung mande choangna manpila. Indiba uni gitokbu chonani giminsa ua chonchonbegipa natokrangna agre dalarangkode minokna manja. Ua mongsongde



Arctic sagalo dongbegipa jingjonggipa rokomsa natok (*felly fish*) aro etchaluk, gap aro ugita bikrok gngangparango chae tanga.


Timini kime namen bilakbea. Mande ringo donge uko rimode ua kimechin uko satpake chi gimikkon kaspu bokbak bokbak dakatpila, aro ua ring gimikkon kosakchi tangdoate bekningatna mana. Uni daldalbegipa gangchingrangba una jrona dakchakanisan ongaigija silchidare gitaba onga. Uni gingting skoni kosakosa, aro ua rangsitna chini kosakchi nadoahaode, uni kasprangoni

tangdobagipa balwani bilchi banga chikon gongdingding dake kosakchina tangdoata. Timirang kenrakbegipa onga, ua ontiti maiba gamanan kene chiningchi nape kata.

Mitim aro grengko rana timirangko mongsongde sikar karonga. Sikar kagiparang jahatoni ongkate ring chonchona bolprako sakbri sakbonga gakate choange timini rangsitna ongkatako niro-roa. Unon uamang banoba rangsitna ongkatako nikatode, bakan unona reange *harpoon* minggipa sre gnanggipa seluchi uko sue watata. Ua *harpoon* budu robee karika gnang. Suako manarion ua antangni kimechi chiko pala gni dake satpake chi ningchi nape katanga. Unon basakobade kime satpakani ringo nangode ring aro manderang pilakan bikpile kosakchi tangdopile chio gaaka.

Timirang chiningo ruute dongna manja. Uni gimin ua bakbakan rangsitna ongkatbagen ine uie ringo donggiparang uni ongkatbaako gisik rake nitimsoa. Unoba basakoba basakobade ring dingdinggan ongkatbaemung ringkon bikpilate manderangko sripata. Timi suako manmano katwingwinge nenga amchakjae nombokahaode, uamang uko rime jahat baksa kachapemung, uni bigilko kikmano mitimko chimonga, aro uni kusikni grengrangkoba oke raa. Unon uni mitimko jahato chankolrango jrongate bidingna piparango chipe dona. Mitam timini mitim mik gni ongpile ritchara.

## Lesson 12



Grace Darling

Englandni salgro salaramchipak, sagal rikam, agaoni adita mailrang chelao rongbrak dakgipa chichangrang gnan. Ua rongbrakrangni sepangko chogipa jahatrangko mikrakatna ine chichang gesao chaki soe donrongani chubegipa gesa gnan. Uko 'Light House' minga. Walo chogipa jahatrang chakini tengako nike, ua kengni biapko gele simsakbee chona manna gita, ua nokni kosako atamanti chingbegipa chakiko soe wal gimik chingate donrongachim.

Changsao ua chakiko sotimgipa budepa saksa dongachim. Grace Darling minggipa uni saksamangmang demechikna agre un baksa dongpagipa

gipin mande dongjachim. Wal sao balwa tarak-beani gimin ia chichangrani gesaona jahat bol sako manpakbaaha. Ua jahato regipa manderang bangachim. Aditani jamano ua jahat roongo nangtinge tonggni betongaha, aro kisangchini tongsakode uno donggipa manderang baksa manchapangaha. Mikkangchini tongsasan chichango skatrikaha, aro uno mande saksu rimkingkinge chake jokaha. Pringo chaki sotimgipa niwatate nion, betongspa tongsao mande saksu rimkingkinge chakengako nikataha. Chakiko sotimgipa Mande uamangko nikate namen kasachakbee inaha, 'Maiko dakgen, dakchakna chol gri. Balwa tarakbeenga. Sagal namen pokpekbea!' Choanggnigipa mande dongja, ua saksasan, uo ring donggipaba namgipa ongja, aro chonaba chonbeachim. Indita balwa tarakao ua ringko unona choangna mangan ine kadongbrejachim. Indiba uni demechik ua duko gaakenggipa manderangko jokatna amgen ine chanchiaha. Ua antangan ua ringko chona dakchakpagen ine pagipana kurachake, ua duko gaakenggipa manderangko jokatchina pagipako molmolaha. Pagipa demechikni molmolani gimin ringko choongkataha, aro uamang paningsa nengedike choange ua begipa jahatona sokangaha. Indiba uamangni ring chonani gimin ua saksu gimikko rangsan chobana manjachim; mitamko chobachenge donangesa, changsa choangtaie gipinrangko chobateaha. Indake Grace

Darlingni kadongdilachi ua manderangni janggiko jokattokahani gimin uko mingsinga pilakchin gipangaha, aro pilakchinin una mamanti boksirang sokbaaha. Indiba ua rasongko manna gita ruute tangjaha, maina bilsu brini jamanon ua siangaha, aro manderangko uni jokatram bipani sepangon uko gopaha.

### Lesson 13

#### Mande Bone aro Chalakigipa Gamgipa


Saksa game chagipao aba atimbo damsangnangchim. Antangni aba maikai indake indindongaijawa, indake atimbo gimikkon ua weaha. Unon saksa mande bone onkatbae, 'Naa angni nokkingko aruwee angni noktango tomtom dongengakogolmal kana maikai kadonga?' ine kaonange uko manengaha. Gamgipa antangko namen onatbee mesoke banga katarangchi molmolaha. Aro aganaha, 'Angni ia aako weara angna saksasanni namgnina ongaigija, anching sakgnini namgnian mangsonga.' Indake aganachi mande boneni gisikko kasinate un baksa nangrimgrikaniko dakaha.

Mande bone skangde ua mandeni aganako namnikjachim. Indiba ua mande aganaha, 'Naade gamna nangjawa, angan pilak gamna nanggnirangkode gamtokgen, aro biteko manan salode naaba apsan bakko manpagen. Nangni namnikode skanggipa bilsio gee mana biterangoni aani

kosakogipa pilakan angni ongchina. Aa ningoni-gipa nangnin onskagen. Unon gnigipa bilsioara, aani kosakoni kakketko naa rabo, aa ningoni kakketko anga raskagen.' Ua mandeni kumong-grikani katako mande bone namnikaha, aro indaken ongchina ine aganaha.

Unon ua chalakigipa game chagipa, skanggipa bilsio miko gee antangan pilak biterangkode rae ratokaha, megap aro japangrangkosan mande bonena onaha. Gnigipa bilsioara, tamarangrarako geskae bita kakketko antangde bile raaha, indiba mande bonenade budu bidilrangkosan onaiaha.

### Lesson 14



**Raja aro Koedirang**

Saksa raja antangni songnokni giseponi dalb-atgipa patok nokko nina reangengachim. Ramadilo ua adita sildeng gangipa koedirango roong

dokpinekatna rimangengako nike, uamangko chadengdikatemung, sakprakko mai dosni gimin patokko donataha uko singaha.

Skanggipa aganaha, 'Angade mamung namgi-jakoba dakkujachim, indiba angko nina siggijagipa bobilsa tangka due tolgipa sakirangko rime angni kosako tole saki onatemung angko patoko donataha.' 'Sakirang pilakan nangni kosako tole saki onaha ine naa aganengama?' ine raja singaha. Koedi aganaha, 'Oe, Moharaja, anga kangkal mande, uni gimin sakirang pilakan angni kosako tole saki onaha.'

Gnigipa koedi aganaha, 'Ruuta salna skang hakimni jikgipa baksa angni nogipa jegrikahachim. Unon uni kosako basakoba uniako dakgen ine hakim chinge donahachim. Unikoa maiba chonbea aselni giminan paske angko jadokna patoko donataha.'

Gitamgipa koedi aganaha, 'Hakim antangan ainko namedake uijani giminsa angkode patoko donataha.'

Brigipa koedi aganaha, 'Anga antangde mamung doskoba dakkujachim; indiba songo mande saksani noko chauani ongon *police* manderang uijae angkosa chaugipa ine hakimni mikkangona chalan kabaha.'

Koedi saksana agre pilakan indake mingsasiksik pasikani aselko mesokaha. Pilakba antangtangni dosko kurachakjaha. Jamankitiko raja bangki

dongenggipa saksachiko nie aganaha, 'Naara maina patoko dongpaenga? Uamang gitan naaba mamung namgijako dakkujachimma?' Ua koedi jakko chopjole aganaha, 'Moharaja, angade tangka chauahachim, uni gimin angko patoko donade kakketan ongaha'.

Raja aganaha, 'Beben iamangde pilakan agan-  
 enga, iamang mamung doskon dakuja. Iamangde  
 pilakan namgipa manderarasa; uni gimin uamang  
 gita namgipa manderang baksa namgijagipa  
 mandekode donpana kraja.' Indake agane, raja ua  
 mandeni berirangko enge uko reangna watatchina  
 nitimiparangko geetaha. Ua aganaha, 'Ia mande  
 dos gnanggipa ongoba, uan kema kaako manna  
 kraa, maina ua bebekon aganaha.' Ia katako knae  
 gipin koedirang skoko choknoke dongaiaha.  
 Nitimiparang uamangkode ramao roongko dok-  
 pinekatna rimangaha. Indiba ua bebeko agangipa  
 koedikode unon noktangchi reangchina watataha.

## Lesson 15

### Banggria

- I. Ritcha chichet sotsku snini bilsin' bijatchio  
 Banggribajok Juneni jani chignigipa salo.  
 Saoba saoba aganaha, Banggiribaengjok,  
 Uko knae pilak manden kuwak jakwak dak-  
 jok.



2. Sabo, sarang, bisi, kanchi aro parirangko  
Raangchina aganatjok banggirigipako.  
Atchu, ambi, mande gitcam aro maa pa'rang,  
Aganronga banggirio iako uamang.
3. Chanchiachim abachengon ongronga gitasa,  
Moangaigen dao ua moronga gitasa.  
Kimko kimko bikbo bikbo mobabebeaha,  
Bola, waa, abri, ading berurubaaha.
4. Uko nike manderanga namen kenbeaha,  
Jika seko, dea ma'ko amgriktokbeaha.  
Saobara aganaha, 'Ang dea bachijok?  
Rebaboda sepangona angade sinakjok.'
5. Saobara aganaha, 'Ang deko niggija,  
Sinakama dao anga uko kudimgija!'  
Indi ine degipani sepangchi reangna  
Joton kabeaha ua detangko manena.
6. Indioba degipani sepangchi sokgija,  
A' moana gitilaha chakatna amgija.  
Gitilemung romromari chakatna manjajok,  
Chrike dongaria ua detangchi sokjajok.
7. Indakemung maa paa aro degiparang,  
Dingtang dingtang ongtokaha danang uama-  
dang!  
Simsangni chi jolo aa gananggija bata,  
Ua songrang jolon danang mandeba sibata.
8. Abrirangba daldalbea ua chijolrango,  
Sinabani krara danang gamgiparang uno.

Saobade nokgimikan aningo napaha,  
Segipa degipa pilak sie bonangaha.

9. Uni gimin sanibade kalimani ongjok,  
Seni jamanoa danang brangriknasa nangjok!  
Bika adram beobani namatna amjaha,  
Mikron mikchi ongbeoba ongman-  
gaiaha.

### Lesson 16

#### Rongtalatani

Anching pangnan aue, antangtangni beenrangko rongtale rakina nanga; maina aujaode anchingni beenni moilarang beenni chonchonbegipa akolrangko penga, aro unon namgija biba onkakatgiparangko champenge anchingko saata. Aujaode anchingni beenrangba seenga. Auode beenni moilarang tala, aro uni chonchonbegipa akolrangko penggija rakiani gimin beenoni namgija biba onkakatgipa jokna mane beenko ansenge rakia.

Anching anchingni gana chinani bararangkoba pangnan surongenba rongtale rakina nanga; maina bararangkoo rongtale rakijaode uarang seenga, aro mamanti saanirangchi mandeko saata. Anching antangtangni dongram nokrangkoba rongtale rakina nanga. Pilak moilarangko pangnan itroke galna nanga; maina moilarangko itroke galjaode nok nitoja, aro mamanti seengarang onkate uno donggipa manderangko saata.

Nokni noksam nokilrangkoba rongtale rakina nanga. Pannan pilak moilarangko itroke galna nanga; maina moilarang dongode uarang sodape uarangoni namgija seenggipa biba ongkate mande-rangko saata.

Mitam Achikrang antangtangni chaa ringani gimin namedake simsakja, aro antangtangni nok jamrangko namedake itroke tarie dongja. Noksam nokilrango mamanti moilarangko sodapna ona, indaken mamanti saa dingarangko mane sininga. Achikrangni janggi tangbanggijani mongsonggipa aselara ian mingsa onga.

### Lesson 17

#### Booker T. Washington—I.

##### UNI BISAMITING

Africao songdonggipa Negro manderang gipin manderangna bate bangbatachim. Uamang skia mangijagipa ongachim. Skango chelgipa asong-rangona ree badinggipa manderang ia Negrorangko bree gipin gipin asongni manderangna palbeaha. Mitam badinggiparang Africaoni bangbea Negrorangko breange Americao donggipa sahebrangnaba paleaha. Ruuta bilsini jamano Negrorang Americao jelroroaha. Uamang nokol itako mangiparang ongachim.

Booker Washingtonba Negro ongachim. Uni atchiram United Statesni Virginia ongachim. Uni

maa paa noklorang ongachim. Uamang kangal, cholgri aro skia mangijagipa ramram manderang ongachim. Uamang boltongchi rikgimin chonchonbegipa nokrango dongachim.

Saksa mane chagipa sahebo banga Negro noklorang gnanggchim. Giteltang ua noklorangko abarango kam kaatachim. Bookerni magipa ia noklorangna mi songtingipa ongachim.

Chonbeengpition, ua noklorang baksa abani chonchongipa kamrangko kapaaha. Abao kam kagipa noklorangna ua chi kotimachim, aro abani merakurangko jamona rikarongachim. Giteltangni noksam nokilrangko gamroke itrokrongachim. Basakoba basakoba giteltangni mi chamitingo una gijip jiptimachim. Booker bimchippipa, nambegipa aro chanchigipa bisa ongachim.

Uororo nokol itani gimin dakgrikani ongachim. Aro changsao pringwalni uni magipa Bookerko dimesae, jasku dipane indine Isolo bidilaha, O Isol, President Lincoln aro uni sipai kotokko dakchakbo, maikai uamang ia dakgrikao amsranggipa onngen, aro ia angni kasabegipa dedrang, aro angni jat Negrorang ia nokol itako manaoni joke jakgitel onngen. Antang magipani Isolo bidilani pringosa, uamang nokgimik aro abarango kam kagipa pilak Negrorangan nokol itako manengachim ine Booker uichengaha. Maina bangbea Negrorang abarango bangen duk chake kam kaengachim, aro uamangni dormaha

dongjachim. Uamangni jik dedrang gnang, indiba uamang antangtangna dongchakani nok, aro antangtangna game chana abarang dongjachim. Uamangni dongchakenggipa nokrang, aro uamangni gamenggipa abarang pilakan uamangni giteltangrangnisa. Indita bangbea manderang song gri, nok gri aro aba gri, gipin asongo, gipin jato nokol itako manaha. Iarangko chanchie Booker gisiktango dukko manbeaha, aro ua sal intaltal antangni jatni manderang maikai jakgitel onngen, aro maikai uamang silrorogen, uko uni gisiko jringjring chanchia ongkataha. Iarangko gisiktango rabite ua pangnan antangni pilak dakarango bebe onгна aro kamtangko name chusokatna simsakbataha.

Americao dakgrikani ongmitingo Bookerni wanggipa antangni nokgipaoni katangaha. Aro dakgrika bonahaoa, aro pilak nokol itgiminrang jakgitel ongatako manahaoa, Bookerni magipa antangni bisa sakgitamko rimbite antangni segipaona reangaha. Uamang mail ritcha gitamna bate jaachi reangna nangachim. Uororo Bookerni bilsil bilsil snisan ongaiengpitichim. Booker schoolchirena manjachim, maina ua chongipa ongobakamko kana nangachim. Ua kariko choani akolokamko kaaha.

## Lesson 18

## Booker T. Washington—II.

## UNI SCHOOLO PORAIANI

Booker T. Washington poraiani chol dongjaoba maibakai poraina manode namgen ine chanchiaha; aro ua salni schoolona rena manjaoba walni schoolo poraie walantio banga mailrangko reangrongaha. Ian una nengbeani ongachim. Indiba aditani jamano ua akolrango kam kaani pal akol nokgipani jikgipao kam kana cholko manaha. Uni nokgipa bebe aro kakket onge kam kaako am'achim, aro ua indaken dakaha. Ia kamrangko kakket aro bebe dake gipinna dakachi antangna nangipa skianiko manaha.

Unikoa Virginia Stateni Hampton songo gesa dalgipa school donga ine Booker knaaha. Uni gimin kariko choani akolni sepangogipa schoolko wate 1872 bilsio ua Hampton schoolona reangna chanchiaha. Ian poraiani aro gamaniko skiani school ongachim. Ua schoolona reangna amna gita nengbee aro dukrangko chakbee kam kae banggija tangkarangko manpaaha, aro uchin ua schoolona reangani cholko dakaha. Ia Hampton schoolo napon ua schoolni mechik skigipa nok itnape poraichina una cholko onaha. Ua poraichakani kuturi, bench, mej aro pilakkon salprako changgitam ba changbri itrokrongachim. Ua waltingbee

walo kam kaoba pringanti baji brio chakate lessonrangko aro antangna gipin nangarangko dakrongachim. Bara chuongjae sinako chake, kitap dongpajae rasroe, chutimiting salrango kam kajojoe, joton kabee ua poraiaha. Ua schoolni chatrorang aro skigiparangba antangtangni gimin-san chanchigija songtangna aro gipinrangna maiba namgniko dakna nanga ine chanchigiparangsan ongachim, aro gipinna kam kaakosa kusi ongani ine chanchiachim.

Booker jakni kamrangko chonnikjachim, aro Negro school geantini chatro sakprakkon kam kaani rasong ba namgniko masiatna ua joton kabeaha. Chakchike aro bimchipbee poraiachi ua schoolo manbegipa ongaha.

1875 bilsio ua Hampton schoolko matchotsrange songtang Maldeno Negrorangko skiani schoolo kamko kaaha. Uano pring 8 bajioni atam 10 bajimangona kingking ua pangnan kam karon-gachim. Dalkalgipa mea aro mechik bisarangna gipin school aro Sunday Schoolrangkoba dakaha. Indake kam kaoba uni dormaha bangjachim, aro uni giminde ua chanchijachim. Gisepo sal jokon Hampton schoolo napena kragipa banga Negro panterangko ua skiteaha.

1878 bilsio United Statesni skotong songjinma Washingtono adita jarangna ua skidaptaiaha. Ia schoolo kam kaanirangko skijani gimin uan Hampton schoolna bate nambatja ine ua chanchi-

aha, aro uno poraigipa mea ba mechik bisarang aratangtokengaha ine nike ua duk manbeaha.

Indake skidapani jamano jinmana aganprakani kamko kachina ua molmolako manaha. Aro uni jamano uko Governmentni maiba dalgipa kamo donna mangsongon ua jattangna skiao dakchakpana manjawa ine nike uko jechakaha. 1879 bilsio ua sal samsa skigipa aro sal samsa chatro dake Hamptono naptaiaha. General Armstrong, schoolni Principal, Hampton schoolni chukalgipa classrangna skichina Bookerkon namnikaha, aro ua uamangna skiaha.

### Lesson 19

#### Booker T. Washington—III

##### UNI KAM KAANI

Negro aro Americani burungni manderangko skina uamangni biltangtangchin dakgimin schoolrang dongoba sahebrangko skiatpana Negro school gesaba dongja ine nike saheb aro gipin manderang poraibrinna kragipa school gesako dakna tangkarangko gilatna didibemano, antangan chonbatgipa jat ongoba chubatgipa jat sahebrangna namgipa school gesako dakdilna ua krengebeaha, aro jaman-kitiko ua amaba amaha.

Americani burungni manderangko bilsio sana skimano walni schoolo skigipa ongnaba ua donako mantaioa, ua ukoba jechakgijan rae, abachengon



sak chikung ba sakchignisan chatro ongoba, ruut-gijan uko sak ritcha gitam ba ritcha bri chatroran-gni skiani school ongapilaha.

Jamano Booker Alabama Stateni Tuskegeeni poraiani schoolni mingsinggipa Principal ongaha. Ia songo songdonggiparang sahebrangna bate gisim manderangan bangbata ine nike General Armstrong, schoolni Principal, Bookerkon ua schoolni Principal ongchina namnike watataha. Ua songni mitam manderang schoolko namnikjachim, aro Negrorang leka pora manahaode antang-tangna kam kajawaha ine chanchie sahebrangoniba mitamde Negrorangko schoolo aro kamrangko skiatna namnikjachim. Indiba Booker ruute joton kae namgipa school nokko rikdile 1881 bilsini July 4 gipa salo ua saksan skigipa onge schoolko abachengtaiaha. Dalgimin, aro adita skia mangiminrang, gimik sak kolatchi schoolo napchengaha. Uno poraigiparang jakni kamrangko nengnikani gimin kam kana nangjana gita skigiparang onge tangkarangko mannasa schoolo poraiachim. Indiba poraigiparang schoolko watmano cholibatna manna gita, gama sua aro daka rikarangni giminba ia schoolo skiaha. Aro jamano ia schoolo poraigiparangko dakchakbatna manna gita aba damsako banga tangkachi bree, uko gamatna am'on, uno poraigiparang nengnike aro kratchanike gamjaengoba Booker antangan uamangna game mesokdilaha.

Jamano gipin skigipa Miss Davidson ua schoolo nape kamko kapaha, Booker aro Miss Davidson sakgnian kumonggrike kamko kae Gitelni dilako jarike bangbea namgniko jatangna aro sahebrangna dakdilbeaha.

Songtangna aro jatangna namen nambegipa kamrangko kadilmano, 1893 bilsio antang baksa kam kapagipa Miss Davidsonkon bia kae Europechi dikdiksana rona, aro uno donggipa mande-rangmung agangrikna reangon ua mande rasoako manbeaha. Ua London songjinmao mamanti jatrangni tomao dongpaaha, aro anchingni rani Queen Victoria aro dalgipa mea aro mechikrang baksa rorime, aro agangrike banga namgniko mane, Americachi reangpile, uni atchiram song West Virginiani Charleston aro sepangbatgipa songrango Negro manderangna leka porako skiani gimin aro uno gama suarangni gimin aganrorobeaha.

Europeona reangna skang mingsinggipa Harvard Universityni dilgiparang una M.A. upadhiko onon, ua antangan chongipa nokolni jat, aro mande raakó manna kragipa ongpajaoba, Isolni dilachi ia gadangona sokpae dalgipa uigipa Americani manderangni kasae ona upadhiko manpaaha ine ua grapaha.

Booker aro uni magipani changsao Isolo biaha gitan, 1865 bilsio Negrorang nokol itako manaoni jakgitel ongsrange banga namgniko manroroangaha. Ian Isolni patiani ongaha.

Ia lesson gitamko poraie anching iako uia, chongmotan mande kangal ongbeoba, una cholrang dongjabeoba, gisik nange aratgija, antangna ba gipinna kamko kaoba, bebe aro kakket dake bimchipe chusokatsrangna mangsongode, Isol uko dile una patigen, aro ua banga mandena namgniko dake mingsinganiko mangel.

## Lesson 20

### Tangka

Anchinga pilakan tangkako jakkalronga. Tangka dongjaode mamung bostukoba brena nenggenchim. Skango tangka dongkujamitingo, manderang maiba bostuko brena skode, bostuskachisa sregri-kna nangachim. Naa antichi reange maiba bostuko brena skode, mi ba nango gnanggipa maiba bostuko antiona raange nangni manna siggipa bostu mingprakni pal nangni mi ba gipin bostuko ontiprak onskaesa brena mangenchim. Nangni manna siggipa maiba bostu antio dongjaode, ua bostuko palgipa mandeni dongaona miko ripeangesa ua bostuko sreskae rabana mangenchim. Naa matchuko manna skode, aro ua matchuko palgipa mandeni song chelaosa dongode, aro ua matchuni pal bangbea miko raange onskana nangode, uan mairongpile nengbeani ongenchim! Indiba dao tangka dongani gimin bosturangko brena altuaha. Naa nangni mi ba maiba gipin

bostu, ba jeko naa palna ska uko tangkana palemung, tangkachi je bostuko naa brena ska uko raangskana mana. Naa chela songchi reangna nangoba tangkako rabbitari reangna mana. Unon ua tangkakon nangni chaa ringa aro reani koros-rangna onna mana.

Tangka, ana chetni, ana brini aro ana gnini sukirangko rupako daka. Gipinrang togina manjana gita uarango rajani skoko mohor sudapa aro bimungko sedapa. Ana sani sukiko nickel minggipa silko daka. Gipinrangni rikingko dena, indiba ana sani sukini rikingko densranggija adita rikel ritchook dake dona. Paisarangkoa tamako daka, aro uarangni rikingkode apsan dake donaiia. Sonana agre rupani sil gipin silrangna batede gamchatbatani gimin rupako dakgija gipin silko tangka dakode cholijawachim; maina rupara antangan gamchatgipa ongan gimin uko peebe mamanti tarianina ganding chinding dakna mana. Indiba silgrak ba gipin silkode indake dakna manja. Tangka gongsani pal apsan jrimgipa dalgipa tama ba silgrakara tangka gongsani gamchata gita onna manja.

### Lesson 21

#### Bararangko Krae Gana Chinani

Anchingni bararang maikai beenni dingako rakia, ba dingako jokna ona iako anching kitap gnio poraimanaha. Uko chanchiode, anching

basako mai barako ganna kraa, uko niode nama. Dingkario kimilni bararangko gano chinode anching dongtojpale dingnikbegen. Sinkario bagipa kilni baramangmangko chinaiode anching sinnikskagen. Indide anching dingkario kilni bararangko aro sinkario kimilni bararangko gano chinode nambata. Anching kari ba salna kraa gita barrangko jakkalode nambata.

Iana agreba gipin chanchiani gnanpiti. Anching aako gamani, mesu geani, nok repiani, chi koani ba *football* kalani somoio namgipa ba seengipa ba suna namgijagipa bararangko gano chinode, pilakan anchingko goka ine ingen. Maina kam kamitingo indaka bararangko ganode, uarang amang nange moila onngen, aro suon uarang surininggen.

Schoolo poraimitingo barako moila ongatani dongbreja. Anching schoolchi reode nama bararangko ganna chinna kraa. Schoolo moila aro gringimin bararangko ganna chinna nitoja, aro miksu jaksugija, aro kni rokchitgija reode, uaba kraja.

Dalgipa mandeko mikkang pana nangode, namgipa aro rongtalgipa bararangkosa ganna chinna kraa. Maina moila aro gringipa bararangko gane mikkang paode mande ragijaniko mesokani onga. Uni gimin anching giljachi reon dalbatgipa Isolni mikkangona napangani onga ine uie uko mande rana gita namgipa aro rongtalgipa bararangko ganna chinna kraa.

Anchingni songrango chiko altuen mana. Uni gimin anching nengmangija bararangko suna mana. Uni gimin moila bararangko ganna chinna mamung paskani dongja. Grinbachenga aro napongbachengarangko simsake koe tariode bararang baibatbegen, aro grina bararangko ganna nangjawa.

## Lesson 22

### Sagu

Sagu namgipa aro ritchenggipa chaani onga. Doctorrang sagipa manderangna saguko chachina onronga. Sagu besual bitchri gita chonchona indiba bokbea. Mina bate sagu mendi gnanggipa nambatgipa chaani onga. Sagu rokom gni gnan. Rokom sa chonchona, ukon anching jakkalrongpara; rokom gipin ruti gita ongpile daldala. Malaca aro Philippine chichangrango sawe bol masa donga; ua bolni bibrongko bikote, suknin-genba gitчерachi moe rita, aro uni mechikosa ranate saguko daka. Ua bol mik chisni ba mik chichetsan chuaia. Skango ua Indiao grichim, indiba mane chagiparang songgipinrangoniko rabae geahani gimin dao bangbaaha. Garo Hillso donggipa saweonikoba saguko dakna mana.

## Lesson 23

## Dalgipa Roong

Changsao antangni raiotrangna namgipa dak-bewalrangko skina gonggipa raja saksa gnanchim. Ua aganaha, 'Aratgipa aro simsakgijagiparangnasa namgija onga, indiba bimchipe kam kagiparangna Isol ia agilsakni namnamarangko ona.'

Wal sao ua antangni nokni sambao sorokni bijatchio dalgipa roong dotsako donenba, repak-giparang mai dakgen ine nitimaha.

Pringo Peter minggipa aa gamgipa mande saksa merakuko gatgimin banga matchu garirangko chalaie repakangenggipa uko nike aganaha, 'O ia aratgipa manderang! Nibo, ia sorokni bijatchio dalbegipa roong gnan, saksaba uko jitna antangko nengatja.' Indine agane ua antangni matchurangko gele moangaha.

Unikoa sipai pante saksa kusi ongani gitko ringjoljole rebaaha. Uni tupio dome gnanchim, aro uni japingo tonualko rabetengachim. Dakgri-kon mairongpile daldalgipa kamrangko kaaha, ua uarangko aganna namnikbeachim. Ua skoko dechaoe rejoljolmitingo roongko nikjae jagidote chikkipe gaakaha. 'Aratgipa gokarang! Indakgipa roongko sorokni jatchio donara mairongpile gisik gri!' ine ua aganaha. Konta sani jamano palgni bosturangko gurerango gate ua gitimni sepango chagipa antiona rebagipa mahajon sakdok

sokbaaha. Uamang roong aro bolni gisepgrikko nengedikesa antangtangni gurerangko moangna manaha. 'Soroko indita dalgipa roong gngang ine iana skang pilakba nikmankujama? Ia asong gimiko dongenggipa manderang pilakan uko jitna arata' ine uamang aganaha.

Uandake anti gitamna kingking ua roong uano dongaiaha. Pilaknan ua champengani ongaha, indiba pilakan saksa sakgipinna nise uko donaiaha.

Unon raja, uamangna maiba aganani gngang ine antangni pilak raiotrangko badiaba salo antangni nokni sepango tomchina aganataha. Manchiani sal sokahaon, banga measa aro mechikrangba soroko tomaha. Gamgipa Peter, mahajonrang aro ua sipai panteba ua tomao dongachim. 'Antangko duule chadenggipa manderangni aratako raja uijawa ine anga chanchia' ine Peter aganaha. Unochacha singga sikaha, aro rajani rebaengako nikaha. Ua gureo gakate ua roongona sokaha, unon ua ongone aganaha, 'Angni ripengrang, anti gitamna skang ia roongko iano dongipara anganchim. Nasimang pilakan uko nikaha, indioba pilakba uko jitgija indaken donangari mandeska-kosa uko jitjahani gimin matnangaha.'

Unon ua gonggonge ua roongko bilaha. Uni ningo kongdap daka gngangchim, aro uano chongipa silgrakni bakos gngangchim. Uano tapgipa lekao seako pilakan nikna manna gita raja bakosko dedoaha. Uano indake sea gngangchim,



'la roongko bilgipana.' Raja bakosko kulie dedoe songtekataha, unon unoni gesa nitogipa sonani jakstem aro chinggipa sonani tangkarang kap kolgrik gaakaha.

Unon pilakan roongko gele reani pal uko romtome galahaode nambeginokchim ine chanchitokaha.

## Lesson 24

### Goliath I

Philistirang baksa Israelrangni dakgrikmitingo, Philistirangni gisepo Goliath minggipa saksa dalbegipa mande dongachim. Uororoni dakgrikao, dakgriknasienggipa dol gnichinin bilagipa mande sakprakko dakgrikna watchengrongachim, aro uamang sakgnini gisepo, je dolchini mandeko ama, ua dolkon amaha ine chanachim. Goliath dalgipa aro bilagipa mande ongan gimim Philistirang ukon watataha. Ua Goliath salantin, pring atam, tamburangni apalona rebae Israelrangko rabirongachim. Israel manderangni gisepo un baksa warachakna amgnigipa bilagipa mande saksaba dong jachim. Uni bimangko nakarin bangan una kenachim. Uni gimim Israel manderang namen jajrengbeaha. Unochacha Daud minggipa Israel mande saksa bakrao antang pagipani mes jakrangko nirikengachim. Ua bengjuri gona changbegipa ongachim.

## Goliath II

Daudni adatang sakgitam Saul minggipa Israelni rajani sipairang baksa dakgrikna reangpaahachim. Uamang Elani akaweo tambu pinge dongengachim. Unon Daudni pagipa sal sao adita rutirangko antangni adatangrangna raange onchina uko aganaha. Uni gimin Daud mesrangko pagipani jako donange adatangrangna rutiko rae Elani akaweona reangaha. Unon Daudni uno dongmitingoba Goliath tamburangni a'palona rebae pring atam Israelrangko rabie uamangko chonnikaha. Goliathko sootna mangipanade Saul banga gamko ongen, aro antangni demechikko una bia kae ongen, aro uni manderangko Israelrangni gisepo jakgitel ongatgen ine manderangni agangrikako Daud knaaha. Ua katani gimin manderango tale singe ramano ua antangan Goliathko sootna mangsongaha. Ua aganaha, 'Ua tanggipa Isolni kotokko chonnikna gita, ia bigil rasotgijagipa Philisti mandea sawa?' Indiba uni adatanggipa Eliab ia katarangko knaoa, Daudko gaora degipa ine namnikjaha.

## Goliath III

Manderang baksa Daudni agangrikani katarangko Saulna knaataha. Saul Daudko okamate una aganaha, 'Naa ua Philisti mande baksa dakgrike uko warachakna amjawa, maina naa pantesan, aro ua pante intaltal dakgrikgipa onga.' Unon Daud

Saulna aganaha, 'Nangni nokol antangni pagipani jakko nirikengachim, aro singho ba mapil rebae jakoniko mangsako balangoa, anga uko rikangaha, aro uko doke uni kusikoniko uko jokataha. Singhoni aro mapilni jakoniko angko jokatgipa Jihovaan ia Philisti mandeni jakonikoba angko jokatgen.' Indine aganako knaahaoa, Saul uko



warachakchina watataha. Saul antangni dakgri-kani tarianirangchi Daudko tariatahachim. Indiba Daud uaranko done chiringoni roong namnamako dotbonga kolemung antangni mes nirikani goldik aro bengjuriko rae reangaha. Unon Daudni indake antangona rebaako nike Goliath aganaha, 'Naa goldikrangko rae angona rebaara, angara achakma?' Unon Daud aganaha, 'Anga daalo nangni manggisiko sakoni dodrangna ongen.' Goliath uni aganako knae sao one kaonangbee chabaaha.

### Goliath IV

Daud Goliathni sao one chabaako nike aganaha, 'Naa tonual aro seluko rae angona rebaaha; indiba anga nangni chonnike rabigimin Israelni kotokrangni Isol Jihovani bimungo nangona rebaa. Daalo Jihova nangko angni jako ongen. Anga nangni skoko nangoniko rasotgen, aro



Philistirangni kotokni manggisirangko sakoni dodrangna ongen, aro Israelo Isol gnang ine agilsakni pilak manderang uigen.' Unon Goliath kaonange Daudona chabaoa, Daud antang monaoni roong dotsako rae Goliathni mikkingo bengjurichi goaha. Unon Goliath gitilaha. Aro Daud antango tonual dongjani gimin Goliathni tonualkon rae uni kosako gakate skoko rasotaha. Unon Philistirang pilakan kene katangaha, aro Israelang uamangko Gath aro Ekronona king-

king rikangaha. Indake Isol Philistirangni jakoniko Israerlangko Daudni jakchi jokataha.

## Lesson 25

### Dorong


1. Nibo ringna sikenggipa do'ko salgichiko,  
Kasri kasri nigitoe ringenggipa' gitko.  
Ringna sika amchakjaen janggide sinakjok,  
Indioba agilsakni chikode ringjajok.
2. Salrakani dingan danang chaknan ampilgija,  
Indioba bia ua uko dingnikgija.  
Ringna sikenggipa gipin gipin pilak  
dodrang,  
Chibimani chikon ringa uamangde danang!
3. Bildingdinge gitko ringna pangnaba neng-  
nikja,  
Chiko ringna Dakgipao biako dongdikja.  
Aiao maikai kasabea Gitelni gisikba,  
Ruutgijan mikka wa'ta ua doonaba.
4. Chatok ine Bengalirang minga ua doko,  
Pangnaba ringpaja ina chibimani chiko.  
Mikka bitchikosa ringe uade tangronga,  
Indi ine banga manden uko mingsingronga.
5. Sikipabo Achik songni chongipa bisarang,  
Ua doo gita ongbo panterang metrarang.  
Agilsakni mamaanti sukrangko ninabe,  
Uarangni majoao na'mang gaaknabe.

6. Salgisakni sukko manna namen mangsong-  
bebo,  
Nasimangna dakchakchina Isolo birongbo.  
Jaksramgipa Isol nangna pilakkon patigen,  
Nangni amgijani salo uan dakchakronggen.

### Lesson 26

#### Kitapko Chapa Kachengani

Daororo mamanti namnama kitaprangko manderang dam nome bree poraina manenga, indiba kitapko chapa kaani kol dongkujamitingo indake ongjachim. Uororo manderang kitapko manna nengbeaha. Kitap kingantikon jakchisa sena nangani gimin urangni dam rakbeachim. Ram-



ram manderangde kitap kingsakon brepana manjachim. Indiba daode anching mamanti namnama golpo aro noksarang gnunggipa kitaprangko dam nome brena mana.

Germanyoni mande saksasa jakchi seana bate kitaprangko gongrakbate seaniko dake nina joton kachengaha. Uochachan Londonni dokan gesao donggipa pante saksas Germanyani sepango

donggipa badiaba songo dongpaegipa gngangchim. Ua pante antangan nengbee kamko kae gam gna-  
nggipa ongaha. Uan kitaprangko namnikgipa  
ongachim. Uni gimin ua, Germanrang kitapko  
dakani nambatgipa cholko manaha ine knaoa,  
antangba skipana sikaha, aro antangan bakbakan  
reange kitapko dakani cholrangko niaha.

Bolpilingo oikorko bikpile rae kaliko nongmra-  
kemung uko maiba lekao sinjetdapode ua lekao  
oikor sea gita magapako nikna manaha. Uandaken  
bangbea oikorrangko bikpile rachimonge uarangko  
kali nongmrake lekao tapode uarang pilakan sea  
gita magaptoka ine nikon, ian kitapko dakna  
altubegipa chol ine chanchiaha. Indaken ua banga  
bolplengrangko rae, oikor dakchimingemung  
antangni sechenggipa kitapko chapa kaaha.  
Indaken English kusikchi skanggipa kitapko chapa  
kachengara England songo onggija gipin songosa  
ongachim.

English kusiko kitapko chapa kachenggipa  
mandeni bimung Caxton ongachim. Ua gipin  
songo bilsu sotbri dongani jamano antangni chapa  
kaanirangko rae Englandona rebapile Londonni  
Westminster Abbeyni sepango donggipa dokan  
gesao uni chapa karam biapko dakaha. Ramako  
repakgipa mea mechik banga manderangan uni  
chapa kaako niangrongachim. Banga bisarangba  
uni chapa kaako nina rebarongachim. Ua antangni  
chapa kaanirangko uamangna mesokrongachim,

aro ua kitaprangko chapa kamanoa, ua uarangko uamangna dam nome palna mangel iné aganaha. Englandni rajaba England songo chapa kachenggipa kitapko nina reangaha, aro uko chapa kaengmitingko gisik nange niaha. Caxton chapa kagimin lekako rae teme uko Edwardni jako one aganaha, 'Iarangko damsan koe, uni bigilko dake, rikingrangko apsan ramanahaosa uan kitap ongen. Skang manchenggipakon anga nangna onatgen.' Raja namen kusi ongabeaha, aro kitapko chapa kaanti una kingprak onatchina uko aganaha.

Ruuta bilsina kingking Caxton English mandrerangna poraichina iné kitaprangko chapa kae antangni janggi tangani salko reataha. Caxtonni sal intal dao bilsil ritcha bri ongangmanpilaha, indiba dao anchingni poraina manenggipa namnambegipa kitaprangni gimin anching uko mitelkuna kraa.

## Lesson 27

### Rajani Bariko Nitimgiparang

Badiaba saksa rajao dumbur bolni bari dama dongachim. Ua dumbur bolni biterangko ua namnikbeani gimin, uarangoni bite rongsaba gimajana gita nitimgiparangko donna mangsongaha. Indaken bariko dongtimchina ua saksa mikgri aro saksa jakorako donaha.



Pringo raja bariko nina reangon nambatgipa biterangoni bangan dongjaha ine nike uarangko mai dakaha ine nitimgiparango singaha. Saksa aganaha, 'Angade uija.' Sakgipinba aganaha, 'Angaba uija.' 'Nasimang antangtangan ua biterangko chaahama?' ine raja uamango singaha. 'Angade jakorani gimin bolo gakate aknaba manpaja,' ine koragipa aganaha. 'Angade pangpang akpanaba mikronan nikpaja,' ine mikgrigipa aganaha. Indiba raja gisik senggipa ongani gimin sal sao time niaha. Mikgrigipa mande jakoragipako pakkreo gate ree uamangan dumbur biterangko ake chaua ine nikaha. Mikgrigipa mikronchi nikna manjaoba antangni jaarangko jakkalaha. Jakoragipa mande jaachi rena manjaoba mikgrigipani pakkreo gakate antangni jak aro mikronko jakkalskaaha.

## Lesson 28

### Dr. Rouse

Bengalni mingsinggipa Kristian Missionaryrangni gisepo Dr. Rouse saksa ongachim. Ua Englando donggipa Milton minggipa songo 1838 bilsio atchiaha. Ua skango Church of Englando skiako manachim, indiba ua toromko gipinrangmu tosusae nie jamano Baptist mondolio napaha. 1855 bilsio Stepney Theological Collegeo nape toromni japangko rongtale skiako manaha. Ua

1860 bilsio Baptist Missionni watatako mane Bengalona rebahachim, indiba saani gimin bakan songtangchi pilange adita bilsina kingking uno dongna nangaha. Songo dongmitingo ua Haverford Theological Collegen Greek, Latin aro Hisapni skigipa (*tutor*) ongachim. 1872 bilsio Indiaona rebapile Sastro Gitcham gimikko are Sastro Gitalni adita tikarango Bengali kusikchi, aro Mussulmanrangna mangsonge banga kitap-rango Arabic kusikchi seskaaha. Uarango Arab asongo aro Asiani Turkeyoba gipataha. Dr. Rouse Baptist Missionaryrangni gisepo seskaanini gimin mingsingiparangoni saksa ongachim. Ua Dr. Kerry, Dr. Yates aro Dr. Wengarni segimin Niam Gital Sastroko niroke setaichina donako mane 1893 bilsio Rev. M. N. Nath baksa pilak Sastroko setaiaha. Ua Indiao dongmitingo basakoba English Baptist Societyni Secretary, basakoba chapa kaani pamong aro basakoba British aro Foreign Bible Society aro Tract Societyni kamko kapagipa ongachim. Ua 1908 bilsio songtangchi reange 1909 bilsio siaha.

### Lesson 29

#### Mane Chagipani Hira

Saksa mane chagipa Jihudini kangalbegipa songsul saksa gngangchim. 'Nangni gam gimikan basakobade nangni kangalbegipa songsulni

ongtokgen,' ine katchinikgipa saksa ua mane chagipana agansoaha. Uni gimin ua mane chagipa mande, maikai uni gam gimikan uni kangalgipa songsulni ongjawa, indake namen simsaksobeaha. Uni gimin ua antangni gam gimikkon pale hira dotsa dalbeako bree, antangni kotipo namedake kodape raemung pangnan ua kotipko kae dongrongachim. 'Daode angni kangalgipa songsul mamung dakeba angni gam gimikko manna amjawaha' ine ua chanchiachim.

Indiba adita salni jamano, sagalo ring choe remitingo, tarakbegipa balwa uni kotipko balpakangaha. Aro ua chio gaake ningchi napangaha. Ua mane chagipa Jihudi chanchiaha, 'Jeba ongbo angni kangalgipa songsulde uko manna amjawaha, chio gimaatoba namengpiti.'

Indiba uni adita salni jamano ua kangalgipa mande bajloniko natok mangsako rabaaha, aro uni bikmako raprakon minokgimin ua mane chagipa Jihudini hirako dotgimik manaha. Indaken katchinikgipani agansoa gita ua mane chagipa Jihudini gam gimikan uni kangalgipa songsulni onsrangaha.

### Lesson 30

#### Bisani Maana Kasaa

Saksa segrigipa mechikni dedrang sak bri gnan-gchim. Ua kangalbeani gimin, uamangko alduna aro skie dalatna nengbeaha. Ua segrini kasagipa

ripengrang depante dalgipa sakgitamma kamko am'e onaha. Bilsu sku samsasan ongaienggipa chonbatgipa Jean minggipako changgipa aro gisik senggipa onga ine nika uko leka pora skiatna sikaha; indiba uamang magipako alduemung degipako schoolo poraiatna gita korosko onnaba amjachim. Uni gimin uamang magipako Hospitalo donemung Jeanko *boarding* noko done leka skiatna mangsongaha. Uni gimin uamangoni saksa iako Jeanna aganna ine uko okamataha. Indiba ua mandeni mainaba nokdringchi napangmitingon Jean ua mandeni mejo dona lekako nika uko rae niaha. Uan uni magipako Hospitalona rebachina geetani onga ine nikaha. Uko nikarin Jeanni gisiko jajrengge ua nokoni ongkatanggalgale antangni kam kao kruani cholarangko donram school nokona reange uarango gane chinemung antangko okamatgipa mandeona rebapile aganaha, 'Anga nangni mangsongako uia, indiba anga mamung dakeba angni magipako Hospitalchina watatna manjawa, angan un baksa donge aldugen.' Ua mande Jeanko uiatna joton kabee aganaha, 'Naa leka porako skimane uigipa mande ongahade, kam kae bangbata tangkako manna amgen, unon antangkoba aro nangni magipakoba dakchakbatna mangen.' Indiba Jean uni aganak rachakjaha. Ua antangni chanchisoa gitan alduna mangsongaha. Aro uni adatangrang una dakchakpana sikja ine nikon, ua antangni bararangko aro

schoolo antangni boksis mangipa ghoriko pale uachi maiba maiba kalani aro chaanirangko bree rabaemung sorokrango palroroaha, aro ua bisaon-iko manderang brena namnikachim. Uni magipako alduna mangsongako uion, manderang uni palako brebataha. Indake ua tangkako manbatroroaha, aro antangko aro magipako alduna chuonge manaha.

### Lesson 31

#### Antangni Dedrangko Jokatgipa Mechik

Saksa dalgipa mechik antangni de sakgniko rimbite Switserlando adita salrangna kingking ropaengachim. Sal sao ua abrini nalsachi donggipa akaweo rona sikani gimin uchina uamangko gari salangchina mande saksako aganataha. Ua abrirangko batsotram biapranga mitamde namen kengni ongachim, maina uaranga mitamde aditan biap apchangket ongachim, aro kamachi tubegipa akuangrang dongachim. Uni gimin ua akuangchina gaakangjana gita gariko chalaigiparang namen simsakbena nangachim.

Ua mechik aro uni dedrangko salanggipa gurea manggitam dongachim. Mangsa mikkang mikkang sale ramako dila, aro gipin manggnia uni kisango salachim. Indake uamang salangmitingo badiaba rama apchongipa retogijagipa, kosakchi rongbrak chubea aro kamachi akuang tubegipaona soko, skang dilgipa gure mainaba rangsan kenaha, aro

rongbrak chugipao bilgakaha. Dikdiksani gisepon akuangchina bilonange regiparang gimiknin signini ongnasiengachim. Bisarang chrikaha, gariko saltimgipa mande maiko dakgen uijae, goka change dongaiaha. Indiba ua mechikni gisiko rangsan chanchiani onkataha, aro ua garioni bilone rangsan dilgipa gureni lagamko jakrachi rake rime jakasichi gureni mikronrangko rimitipe kasne molmola katachi agane uko ramachina salbapile ramako tongtong reataha. Indake ua mechikni rangsan chanchisokani gisikchi ua antangni dedrangni janggiko jokataha.

### Lesson 32

#### Bebegipa Achak Gelert

John Englandni raja saksa ongachim. Ua mamungnaba simsakbrejachim. Uni namnika aro simsakarangni gisepo uni nitogipa demechik Joan aro uni nambegipa achak Gelert ongachim. Joan Prince Llewelynko, chongmotan Prince of Walesko bia kaon, John antangni achak Gelertko bia kaani boksis gita uamangna onaha. Prince Llewelyn sikar kana namnikbegipa ongachim, aro uaba Gelertko namnikbeaha. Llewelyn Gelertko sikar kana rimbitangchengani salon Gelert matchok mangsako rikaha. Ua matchok nenga amchakjae, daona kingking Gelert Bath ine mingsinggipa rongbrako songgoke siaiaha.

Llewelynni sikar kaani singgako sikon Gelertan pilak gipin achakrangna skang chabarongachim. Indiba pring saosinggako sikaton Gelert chabajaha. Ruute singgako sikahaoba, aro uko 'Gelert, Gelert' ine okamahaoba, ua rebajaha. Unon nokgipa sengna amchakjae saksan sikar kana reagaha. Indiba un salo mamungkoba manjaha. Unon ua duk mane aro nenge nokchi pilangmitingo Gelert rama tongsaon nokgipako bildodoe rechaksoaha. Indiba uni kusiko anchian solingsolang dakengachim. Uko nikarin maiba kengnini ongaha ine uina manaha. Ia achak sakoba chikahama ine Llewelyn chanchiaha.

Bilsi sasan ongaigipa Llewelynni degipa saksanngachim, aro Gelert pilakchiba rejaode ua bisani sambao dongrongachim. Llewelyn antang degipa bisako tuatramchina nina daariangaha. Nokgimikon anchi tototako nikaha. Depantegipako tuatram biapko, aro mamanti bosturangni bildingbildang ongako nikaha. Depantegipako am'e nioba pilakoba nikjaha. Gelert kisang kisang jarikangengachim. Uan bisani tuchakram kokkimao nape molmolenga gita grapsiaha. Llewelyn kaonangan gape antangni tonualko dee, Gelertni katongo suprote aganaha, 'Skal! angni degipako naanminokaha.' Gelert chrike nokgipako nigitoe janggi galaha. Achakni chrikako knae bisaba mikrake palang kokkimachini grapataha. Llewelyn antangni degipako sigimin seelni kosako sko gate

tuengako nikaha. Llewelyn dao antangni achakko sootmanahani gimin duk manbeaha, aro ua bebegipa achak maini gimin un pringo singgako sikaton reangjahachim, uni aselko chanchie uiaha.

Llewelyn gisiko duk manbee aganaha, 'Anga nangko tangatpilna manjaoba, nangni daka kamko pangnan gisik rana gita dakatgen, Gelert.' Gelertni rikrorogipa matchok je biapo gitilkrope siahachim, ua biapon Llewelyn uko gopaha. Ritchani ritcha bilsirangna kingking ua biapko repakgiparang roong dotprakprak galdapangani gimin ua biapo roong danara daona kingkingba dongenga. Uko Gelert Bath ba Gelertko Gopram ine minga.

### Lesson 33

#### Game Chagipa aro Uni Depante Sakgni

Saksa game chagipa budepa namen sabeahachim, aro bakbakan sigen ine ua antangan uiaha. Uni gimin ua antangni depante sakgniko okame uamangna aganaha, 'Ang derang, nasimangna donangna angni gipin gam gri, angni abarangkosan nasimangna donangna manaiaha. Anga uko nasimang sakgnina apsangrik suale donangenga. Nasimang mamung dakeba ua abarango gipinni jako gaakna onnabe; maina angni je ontisa gamrang gnan, uarang ua aaon donga, aro uarang miksamang tuaon donga.'

Pagipani simano depanterang, pagipa aa ningo



gam gope donangakon ine chanchie aa gimikkon choe am'aha; indiba mamung gamkoba manjaha. Indiba uamang aa gimikkon namedake chosrangahani gimin ua bilsio mi nambeaha, aro namen bite nangbeaha. Uni gimin uamang antangtangni nengani pal gita biteko manskaaha, aro jamano uamang pagipani mangsonge agananga gamni gimin tale uiaha.

### Lesson 34

#### Jackni Rasong

Jack minggipa mande saksa dongachim. Ua resem barako dakna changbegipa ongachim. Uara tangkani gamchatako uibrejachim, aro antangni jepo tangkako gape chipe raangoba, antangna aro antangni jikgipana nanggijagija bosturangko bree, ba antang baksa jarike ropagiparangna sualari bonataiachim. Indake dakaiasan ongja, bostuko palgipani bia gita damko ua onrongachim. Antangni pala bostukoba dam nombee bioba ua onrongachim. Uni gimin pilak palna aro brena nanganirangko uni jikgipa antangan dakrongachim.

Indiba sal sao Jack antangan bajalchina reangna mangsongaha. Ua adita namgipa resem bararangko raange uarangko saksa badinggipana tangka ritcha dokna palaha. Jamano gada moe rebaenggipa mande saksako nike, tangkana batede ua gadaan una cholibatgen ine chanchie aganaha,

'Naara ua gadako tangka ritcha dokna palgenma, wae? Gade nokgipa kusi onger ansan uko palaha. Indiba ua gadara namen manigijagipa ongachim, aro antangni ska gita reja ine Jack nikaha.

Unikoa badinggipa saksako gronge uo singaha, 'Naa ia manigijagipa gadako raangnara angna badita tangkako onna namnikgen? Chalakigipa badinggipa aganaha, 'Tangka kapsni breoba daman rakbeginok.' Jack ua tangka kapsnikon rarikaha. Ua tangkachi alu gitalko ua breaha. Ua alu namen jrimbeachim. Uni gimin Jack ua aluko raangna nengnike bakbakan natok dokan gesaona reange uko mackrel minggipa natok mangsana sree ukon nokona rabaha. Unon jikgipa natok mangsa mangmangna indita tangkako galbaiahani gimin, namen kaonangbee uni gisik griana uko manengbeaha. Indiba ua natokni okko raprakon namen nitobegipa mukta dotsako nikaha. 'Aiao, iani damde tangka hajal chibrimangba ongchongmotgen' ine ua chrikaha. Unon Jack kadinge jikgipana aganaha, 'Daoa maisa, anga gamchatbegipa ripok gnanggipa natokko brena tangka ritcha dok mangmangko koros kaaiaha, indiba naa angko tangkani gamchatakon uija ine ina. Anga ua natokko brejahaode, daalo naa indita gamchatgipa muktako manna amgenchimma?'

## Lesson 35

**Maikai Raja Kakketgipa Mandeko Bikota**

Saksa raja antangni songnokni kajanako gilna saksa kakketgipa mandeko manna skachim. Indiba jena kadongchakna mana, indake donga kakketgipa mandeko maikai aro banoniko mangen uko uina manjachim. Uni gimin ua iani gimin saksa uigipa mande baksa kumonggrikaha. Ua uigipa mande rajana aganaha, 'Naa nangni am'ako pilakchin uiatbo, aro ua kamko kana siggipa manderangko badiaba salo nangni nokona rebaat-tokbo; unikoa nangni mikkangona pilakan rebachimongmanahaoa, uamangko chrokchina geetbo. Unon uamangni chrokmanahaoa, anga nangna kakketgipa mande chongmotko mesokgen.'

Unon raja ua nigipa mandeni agana gita antangni am'ako pilakchinar uiataha. Kamko kana siggiparangko badiaba salo rajani nokona rebachina tik kaataha. Aro ua sal sokahaoa, kamko kana siggipa manderang rajani nokona rebatokaha. Rebatokmano ua gisik gnannggipa mande kam kana siggiparangko andalgipa bakrogipa kuturi joljol rajani mikkangona reangataha. Unikoa pilakan rajani mikkangona sokchimongahaoa, raja uamangni chrokako nina ska inemung uamang pilakkon chrokchina geetaha. Indiba uamang pilakan kratchaako paske chrokna jechaktokaha. Jamankitiko saksa namen chrokbeaha. Unon

ua uigipa mande rajana aganaha, 'Ian bebe aro kakketgipa mande chongmot onga, iakon kamna sebo.'

Rajani mikkangona reangna nangani andalgipa bakrogipa kuturio rama samtangtangchin, uigipa mande banga tangkarangkon dane donsoahachim. Uni gimin kam kana sigkiparang uko nape reangon, antangtangni ska gita ua tangkarangko rae antangtangni jeprangko gapataha. Uni gimin rajani chrokna geeton ua tangkarang morokroka gita gam'na kene kratchaako paske chrokna jechakaha. Indiba mamungkoba raangpagijagipa saksa mamungba kenchakgijan chrokaha. Indake raja bebegipa aro kakket dakgnigipa mandeko see rana manaha.

## Lesson 36

### Raja Dalgipa Aro Dumbur Biterang

Saksa dalbegipa raja, saksa budepani dumbur bolko geengako nike uo singaha, 'Naara chamanangpakuna ingipa gita mainasa uarangko gekuenga?' 'Haida, angaba iarangni biteko chamanpakuna gita tangpakunaba donga, aro anga antangan chamanjaoba, angni de sudrang charikgen'ine budepa aganaha. Raja aganaha, 'Atcha, naa ia dumburrangni biteko chamanpakuna gita tangkuengode, uarangni biteko chaani salo angnaba

uiatpabo ne.' Budepa uandaken dakna kurachakaha, aro uarangni biteko chapamanna gitan ua bolrangni bite nangaona kingking tanganguaha.

Bolrangni bite minahaon, budepa nambatgipa biterangko ake rajana dingtangmancha raangaha. Rajani nokona sokon uni pilak katarangko aganmano nitimgiparangba budepako rajani mikkan-gona reangchina rama watataha. Raja budepani daka kamko nike namen kusi ongbeaha, aro uni rabaa boksisko rachake, ua budepani raangchak-gipa koko sonako gape onatskachina geetaha.

Budepa ua sonako rae rajako mitele reangaha. Aro indake ongaha, ua budepani sepangbatgipa noksulo donggipa mechik saksa namen mikbok-begipa ongachim. Uni gimin ua, ua budepani sona manbaako nike mikbokemung adita dumbur biterangko koktango brae uni pal sonako manbas-kana kadonge segipako rajani nokchi watataha. Indiba raja ua mandeni mangsongako uisona mane uko sarao chadengatemung uni rabagipa dumbur biterang bonjana kingking ukon gotate watataha.

Nokona sokbaon ua mande pilak onggiminko jikgipana aganeaha. 'Dumbur bitechisan gotatai-aba. Rakgipa narikel bitechi gotatade ongkujaba' ine jikgipa aganemung segipako adita kadim-eataha.

## Lesson 37

**Doka, Dokru Aro Mese**

Dilsa chibimani rikamo dalbegipa bol pangsa gnanqchim. Ua bolo mamanti doorang walo tusirongachim. Wal sao sengnasiachibara, bol japango mandeni jabirangko knae doka mikrakaha. Unon ua aachiko nionoa, saksa mandeko chek dalbeako rae burungchina mikkange reangengako nikaha. Ua mande maiko daknasienga uko uina ske dokaba uni jaman jaman bilangaha. Adita rearin mande adita mirangko aani kosako sate uni kosako chekko namedake badalaha. Unikoa ua sepango bol mitino dongnue dongaha.

Aditani jamano dokru jak sa ugitan bilangengachim. Uarang aachiko nione nion aani kosako bangen sate dongimin miko nikaha, arou ko nikon uarang pilakan mikbokaha. Unon uarangni raja aganaha, 'Anching mikrakna nanga, maina saoba chek sae donengnaba donga. Ongjaode baoni ia burungo mi gaake donggenchim?' Unon mangsa mikbokgipa dokru aganaha, 'Iano mamung kenchakani gnang ine angade chanchija. Bebegitaba anchinga pilakan okkrienga. Saoba anchingko rimna rebaengode, katsona mangen.' Iako knaon pilakan namnike aona bilontokaha.

Dokrurang gaake dongenggipa mikode nikaha, indiba sae dongimin chekko nikjachim. Uni gimin uarang aona bilonarion pilakan cheko nangtokaha.


Unon kenchakani gri ine agane miko chana bilondilgipa dokruko pilakan manenggrimtokaha. Raja uarangko jripate aganaha, 'Daode kaonange manenggrikani ba pilakkoba matnangani sal dongjaha. Nibo ua chek sagipa mande rebaeng-jok. Anchinga pilakan damsan chekko bilbits-rangna hai.'

Rajani agana gita pilakan chekko bilbitangaha. Antangni chekba doorang baksan gimanasiaha ine nike ua mandeba uarangni bilangako jariken rikpaaha. Indiba ua adita rikange nion srapjawa ine nike ua rikangjaha. Dokrurang mai dakgen uko nina ine doka uamangni kisang kisang bilang-paaha.

Dokrurang chelbee bilangmano biap damsao onchoktokaha. Uno mese mangsa akolni ningo dongengachim, aro uan dokrurangni raja baksa ruuta sal intal ripeng ongachim. A'palo jikjakako knae ua sketbaket onkatbaaha. Dokru raja uko nike aganaha, 'Ripeng, chingade ia cheko nange namen duko gaakenga, naa kasapae jokatpajaode chingnide jokani cholani griaha.'

'Isolni kasaani gimin anga nasimangko jokatna mangan' ine mese aganaha. Ua antangni matgipa wagamrangchi chekko tinsote, dokrurangko jokat-aha. Meseni kasae daka kamko nike doka namen namnikbeaha, aro antangba mese baksa ripeng dakna skaha. Unon uarang ruuta salna kingking ripeng onge dakchakgrikaha.

## Lesson 38



## Kakket Dakgipa Raja

Changsao mechik sakgni badiaba biapo dongachim. Uamang sakgnini apsan apsan dalgipa chongipa dedrang sakgni dongachim. Wal sao uamangoni saksa antangni degipako tujete siataha, aro pringo pringnin sakgipinni mikrakna skangan antangni degipani manggisiko rae, uko ua mechik baksa tuate donemung, uni tusienggipa bisako detome rabaskaaha. Pring sengahaoa uamang jegrikna abachengaha, maina uamang sakgnian tangenggipa bisakosa kangseksekaha. Nikpagipa noksul songsulrang pilakba uamangni gisegrikako namatna amjaha. Uni gimin jamankitiko uamang rajaona sokangaha. Ua rajani bimung Solomon



ongachim. Rajaba uamangni katako pee onna namen jajrengaha; maina ua tangenggipa sani de chongmot onga uko ua uijachim. Indiba jaman-  
kitiko uni gisiko namen nambegipa mingsa chanchiani ongkataha. 'Ra, indide ua mechik sakgnian saksaba angni desa aro saksaba angni desa ine ua tangenggipa bisako aganengani gimin, uko jatchio dentonge tonggni dake sualsrangbo' ine raja antangni sepango chadenggipa mandena aganaha. Unon uko dentongbebena amahaoa, magipa chongmot onggijagipa mechik rajani agana gita sualsrangakon namnikaha, indiba magipa chongmot onggipa kaa chakna amjae, rajani jao gaake aganaha, 'O raja, naa ua bisako ua mechiknan onsrangbo, maina ua angni de onga, aro anga uko dentongako nina amjawa. Ua tange dongpaengode, anga uni mik-  
kangmangmangkode nikpana mankugen.' Unon raja ua bisani maa chongmotko uie, bisako unan onaha; maina saksu, uan magipa chongmot ong-  
jani gimin, una kasagijako, aro uko ratongakoba namnikako ua nikaha. Indiba sakgipin maa chongmot ongan gimin uni detangna kasaani ningtuako ua uiaha.

Chongmotgipa maa antangni deko manpile kusi onge rajako mitele reangaha. Pilak gipin mande-  
rangba rajani bichal kana changani gimin uko namnike mitelaha. Indiba tolgipa mechik antang tolani gimin sastiko manaha.

## Lesson 39

## Behalako Gonge Sala

Behala sale biame chagipa saksa kangal budepa wal sao burung bolgrim damsani jatchiko reang-engachim. Adita reargon ua tupi gitcakko stikgipa saksa chongipa mandeko grongaha. Ua chongipa mande una aganaha, 'Bia kaani alao chrokgiparangna behala saltimchina nangko rimangna anga rebaha.' Budepa aganchakaha, 'Anga uani gimin duk onga, maina anga uandaka kamrango sale onpanade kraja, anga budepa ongbeaha, aro ango beholi saa gngang, aro angni behalaba gitcambeahani gimin angade dudet dudet inesan gamatna manaiaha. Manderangde angni behala salako knatimnan sikjawa. Changsao angni salna abachengon, angna pel sa pel gniko gogake onatemung, bakbakan katangchinasa arikataijok.' Chongipa mande aganaha, 'Mamungba ongjawa, naa gonge salahaode uan chuongginok.' Budepa aganaha, 'Ra, indide'.

Unon ua chongipa mande behala salgipa budepako ningtugipa burung bolgrimona rimange damsia chinggipa grimona sokmano, aningni ramako dilange, damsia dalbegipa nambegipa nokdringona sokangaha. Ritchani ritcha nitobegipa mite mechikrang uano dongengachim, aro uamang kusi onge ua behala salgipa budepako duule chrokaha. 'Kasapae chingna gotni sulko salbo,

chinga ruuta sal-intal knakuja' ine mechikrang aganaha. Jedakoba gonge salakosa nanga inako gisik rae, ua budepa antangni behala suriko rae, kudipechi sinjete salna abachengaha. Ua behalako salahoa, uni gisik aro jaa jakrang panteni gita ansaoako aro bilakako nike, aro uni behala surioni knatobegipa sulrang ongkatangengako knae, ua namen aiao inmanpilaha. Antangni behalani kurangni knatoachi muni nangatako mane, beenko rokrek chokchek dakate wal tongsana kingking salaha. Indita ruute salahoaoba ua mamungba nengnikjaha. Unon ua antangni uia kakket sulrangko salmanoa, ua mechikrangoni saksa aganaha, 'Gonge salgipana uni jakba uni ska gitan reangaichina. Daontaltal naa daawalo knatobee salaha gitan, pangnan knatoe salangna manchina.'

Pring gipino behala salgipa budepa mikraka-haon ua antangko behala salna changbegipa ongaha ine nikaha; aro ua antangko bilsu sotbri dambebatenga gita nikaha. Uni behala suriara knatobegipa kurangko ongkatatgipa nambegipa ongpilaha.

## Lesson 40

**Sikhrangni Abachengani**

Sikhrang Punjabo donga. Babarni sason kamit-  
 ingo Nanak minggipa saksa namgipa mande gnan-  
 chim. Uan Hindurang aro Mussulmanrangni  
 gisepo pangnan matchotgija dakgrikaniko nike  
 kasachakaha. Hindu aro Mussulman toromni  
 mitam bakrangko rae mingsa gital toromko  
 onkatataha. Ua uachin dolgnikon nangrimatna  
 mangen ine chanchiachim. Banga manderangan  
 un baksa nangrimpaaha, aro ua uamangko  
 antangni Sikhrang ba sninggiparang ine mingaha.  
 Babar aro uni jamano donggipa Mogul rajarang

uamangko tomtom donaha, maina uamang tomtomgipa, manderang ongachim. Aro uamang antangtangni onna nanggnigipa kajanako onode pilakkoba duk onjachim. Indiba Aurangzeb uamangko namen kasaninggija dake dakaha. Ua uamangko biap saoni biap saona sandiaha; uamangna nengtakaniko onjaha; aro uamangoni bangakon sootaha. Uni gimin ua Sikhrang warachake, rakina ine silchidarerangko rimaha, aro untaltal uamang sipaini jat ongaha. Uamangko Aurangzeb dakgrikao ammano uamang Himalaya abrirangona katangaha. Indiba uamang uni simano rebapiltaiaha, aro jamano salgrochini Indiao dongenggipa bilakbatgipa jat ongaha.

### Lesson 41

#### **Achik Songo Kristian Toromni Ongbachenga**

Achik songo Kristian toromko abachengatgipa pilakna skang Dr. Bronson saheb ongachim. Ua Nowgongosa dongoba, anchingni gisepo Kristian ongchenggipa Rev. Ramke aro uni mamatang Omedko ua jaktangchi 1863—ni February 15 salo Gauhatio napbolataha. Rev. Rangkuba uni jakchin 1866—ni August 25 salo Nowgongo napbolako manaha.


1864—ni May 18 salo Rev. Ramke aro Omedko uamangni madrang bakskana skiechina Dr.

Bronson saheb watataha. Uamang songtangona rebae skion adita champenganirang onkatoba, saksa sakgni kimkim dake bebe ragiparang ongkataha. Aro 1867—ni April jao Dr. Bronson saheb bebe ragiparangko nina rebae mea mechik gimik sak 37—ko napbolatangaha.

1867—ni October jao Rev. I. J. Stoddard saheb Achikrangna Mission kamko kana Goalparaona rebaha. Indiba ua adita bilsina kingking Achikrangna skimano 1873—ni abachengachibaraon songtangchi reangpilaha.

1872—ni January jao Rev. T. J. Keith saheb Goalparaona sokbaha. Ua Achikrangni dao bilsianti dakrongenggipa sobako Goalparao dakdlangchengaha. Uni dongmitingon 1874—ni December 19 salo Rev. M. C. Mason aro Rev. E. G. Phillips saheb uamangni jikrang baksa Goalparaona sokbaha.

Rev. T. J. Keith saheb been ansengjani gimin kamko kaangkuna amjae, 1876—ni March jao songtangchi reangpilana nangaha. Rev. M. C. Mason aro Rev. E. G. Phillips saheb mang Goalparao bilsu gitam donge kam kaani jamano 1877—ni March jao Phillips saheb mang, aro 1878—ni November jao Mason saheb mang Turaona rebaha. Untal daalona kingking Turaan Achikrangna toromko gipatgipa Missionary sahebrangni dongram ongbaha.





THE CHRISTIAN LITERATURE SOCIETY FOR INDIA  
POST BOX 501    PARK TOWN    MADRAS 3

**Price 9 Annas**